

# Xajon ra ma-ni jò ra tsikínda jè Pablo ra isìkasén-la jè Timoteo

## Kó'sín síhixo'ta Pablo jè Timoteo

**1** <sup>1</sup>Añ Pablo, tíbindá-la xajon rakìi, 'añ ra ko'sín tsikíxáya-na Jesucristo koni 'sín nga kjomejèn-la Nainá. 'Koaá 'sín kitsjà tsa'ba Nainá nga kíjnakoón inìma-ná ra a'ta 'tse Cristo Jesús. <sup>2</sup>Ngaji Timoteo ra 'ñó matsjake-la koni tsa i'ndí-na xin-la, Nainá ra Na'ín-ná ma ko jè Jesucristo ra tíjna ítjòn-ná katatsjá-li kjonda, katamahimake-li, kata'se-la kjo'nchán ajin inìma-li.

## 'Én ra tsjá Pablo a'ta 'tse Cristo

<sup>3</sup>Kia nga bítsjen-na ra a'ta tsaji nga kji'tà nichjin, ko nichjin ko nitjen chjà'tà-la Nainá nga tsja-la kjonda, nga ngi tsjeé tíjn kjobítsjen-na nga bexkóon koni 'sín kijtsexkón jñà xita jchínga-na. <sup>4</sup>Kia nga bítsjen-na kjoa 'tse ndáxkìn, sí mejèn-na nga skajeén mé-ni nga kotsja-ila inìma-na. <sup>5</sup>Bítsjeén-na nga ngi ndaá makjiín-li ra a'ta 'tse Cristo koni 'sín kjokjiín ítjòn-la nahí'xtín-li ra 'mì Loida ko jè Eunice ra amá-li ma. 'An, 'koaá 'sín kixi tíjjin-na nga ti'koaá ngaji nda makjiín-li.

## Mi ki ma kosabà-ná a'ta 'tse 'én nda-la Cristo

<sup>6</sup>Kíí ko'sín tísíkítsjen-la nga isa nda tichjiín kjotjò ra kitsjà-li Nainá nga nda tixá-la, jè kjotjò ra itjábé-li 'kia nga 'añ tsakasón-la ndsa. <sup>7</sup>Nainá, mì tsa inìma ra tsakjón kitsjá-ná. Jé kitsjá-ná Inìma Tsje-la ra tsjá-ná nga'ñó, tsjá-ná kjotsjacha, tí'koa tsjá-ná kjobítsjen kó'sín 'sieén nga kixi sijché ijo-ná. <sup>8</sup>Kíí ngatji-ila, kì masabà-li nga nakjoákii xita a'ta 'tse Jesucristo ra tíjna ítjòn-ná. Tí'koa kì masabà-li ra a'ta tsa'an nga ndayá

tíjna'ya tà ngatjì-là nga ya síxá'ta-là Na'ín-ná. Tíkjiín-ko-ná kjohi'in ra a'ta 'tse 'én nda-là Cristo. Jé Nainá tsjá-li nga'ño ra kochjeén-li. <sup>9</sup>Nainá, ijyeé tsachrjekàjin-ná kjohi'in. Kíí xá kíichja-ná nga tsje sijché ijo-ná. Mì tsa kíí-ni nga nda kí'nié. Kí-ní nga ko'sín kjomejèn-là Nainá, tí'koa kitsjá-ná kjonda-là ra a'ta 'tse Cristo skanda tí'sa tjà'tsin-là kjoa, 'kia nga tikje sinda isà'nde. <sup>10</sup>Ndi 'ndi, Nainá ijyeé tsakón kjonda-là nga ijye 'ji Jesucristo ra bachrjekàjin-ná kjohi'in. Tsjahíxín-ná nga'ño-là kjobiya. Ra a'ta 'tse 'én nda-là Cristo, tsakón-ná kjobinachon tí'koa tsakón-ná nga mì tsa jngó kjá kiyé nita kjíá-nioo.

<sup>11</sup>Nainá, 'aán isingatsja-na xá raklì nga 'an kichjàya 'én nda-là Cristo. Tsikíxáya-na a'ta 'tse xá-là nga 'an kokon-yá-là jñà ra mì tsa xita judío. <sup>12</sup>Tà ngatjì-là 'én ra 'an chjàya tseé kjohi'in tísikjíaan. Tanga mì kì masabà-na. Ijyeé tjíjin-na nga a'ta 'tse Cristo makjiín-na. Tí'koaá ndaá tjíjin-na nga ta jngoó jè Nainá tjín-là nga'ño nga nda sùkinda jè xá ra 'an isingatsja-na skanda jè nìchjin 'kia nga kj'íí india-ni Jesucristo.

<sup>13</sup>Nda tijin-takìn 'én nda ra 'an tsakon-yá-la koni 'sín tjín 'én ra makjiín-ná ko kjotsjacha ra tjín-ná nga Cristo titsajnakeé.

<sup>14</sup>Nda tìhitjasìn xá ra nda tjín ra jì kjongatsji. Jé kosìko-li Inìma Tseje-là Nainá ra tjínajin inìma-ná.

<sup>15</sup>Ijyeé tjíjin-li, nga'tsì ra títsajna ya nangi Asia, ijyeé kitsjin-tákon-na, koni jè Figelo ko Hermógenes. <sup>16</sup>Nainá katahìmake xita ra tjíhijyo ya ni'ya-là Onesíforo. Kjin 'ka 'ji síje ikon-na. Mì kì kjosabà-là nì'sín ndayá tíjna'ya. <sup>17</sup>Tà isaá, 'kia nga 'ji i Roma 'ño tsakátsji-na skanda nga isakò-là nándà tjína. <sup>18</sup>Na'ín-ná katahìmake jè Onesíforo 'kia nga kijchò nìchjin-là Nainá. Ngaji ijyeé nda tjíjin-li, ndaá tsasìko-ná ya Éfeso.

### Timoteo, jngo chíchàn-là Cristo ra nda síxá-là

**2** <sup>1</sup>Ngaji Timoteo ra koni tsa i'ndí-na xin-la, 'tì nga'ño-là ijo-li a'ta 'tse kjonda ra tsjá Jesucristo nga jè titsajnakeé. <sup>2</sup>Jè 'én ra kina'yá-ná 'kia nga kíichjàya ya ngixkon xita ra kjin ma-ni nga kíí'nchré, takón-ya-là ra xita kixì ra nda koma-te-la kokòn-ya-là xita ra kj'íí.

<sup>3</sup>Ngaji Timoteo, tìkjiín-ko-ná kjohi'in nga nda tji'mi'ta-là Jesucristo koni jngo chíchàn ra síkjiín kjohi'in. <sup>4</sup>Jngo xita ra chíchàn tíshitjasòn, mì kì tjí'nde-là nga kj'íí xá skaájin

ra tjin ya isà'nde, tjiné-la nga ya sihitjasòn-la jè ra kitsjà xá-la mé-ni nga nda kijnako-ni. <sup>5</sup>'Koaá ti'sín tjin a'ta 'tse xita ra síská. Tsa mi kì kixi síská koni 'sín tjin kjotéxoma-la ra maská, mi kì tjábé-la chjí-la. <sup>6</sup>Jè xita ra bínè-la ijo-la nga nda síxá nga bitje tsajmì tjé, 'kia nga ijye majchá tsajmì, jé tjábé ítjòn chiba-la tsajmì ra majchá koni chjí-la. <sup>7</sup>Tikítsjin koni 'sín tíxin-la. Jè Na'ín-ná isaá nda siichiya-la kjobítsjen-li.

<sup>8</sup>Tikítsjin a'ta 'tse Jesucristo jè ra jaáya-ila ya ajin-la mi'ken, ra ya nchrabá-ni tje-la xitaxá ítjòn ra tsi'kin David. 'Koaá 'sín tsò 'én nda-la Cristo ra 'an chjaya. <sup>9</sup>Tà ngatjì-la 'én nda-la Cristo ra 'an chjaya, kjohi'ín tísikjiáan, skanda na'nño kichaá tjí'tá'nño-na nga tjina'ya ndayá koni jngo xita ra 'nño 'tsen. Tanga jè 'én-la Nainá mi tsa ya tjí'tá'nño ya aya ndayá. <sup>10</sup>Ta kíí ngatjì-la nga ko'sín tísikjiáan kjohi'in nga kjonda 'tse xita ra xá tsjahíjin-ni Nainá, mé-ni nga ti'koaá kitjokajin-ni kjohi'in ra a'ta 'tse Cristo Jesús; 'seé-la kjoajeya ra mi kì fehe'ta nita kjíá-nioo.

<sup>11</sup>'Én kii, 'én kixi-ni nga tsò:

Nga ya 'ken-keé Cristo, ti'koaá yaá kitsajnakon-keé.

<sup>12</sup>Tsa chíkjoa-ná kjohi'in ra skajieén, ti'koaá yaá kotexomakeé Cristo.

Tsa kixé; mi kì bexkon, jè, 'koaá ti'sín kitso-ná; mi kì bexkon-no ra jìòn.

<sup>13</sup>Tsa mi kì sihitjasén 'én ra nakjé, tanga ra jè Nainá sihitjasòn 'én ra chja.

Mi kì koma siikaatjìya-la 'én-la ra jè.

### Jngo xita ra nda síxá-la Cristo

<sup>14</sup>Tikítsjen-la kjoa kii. Tinákjoakii ya ngixkon Nainá mé-ni nga mi ta jná koatiya-ni kjoa 'tse 'én. Jè kjoa ra chitiya-ni nimé chjí-la. Ta isaá síkitsón xita ra 'nchré-la. <sup>15</sup>Nño nda tinè-la ijo-li mé-ni nga nda kijna-ni ya ngixkon Nainá. Ni mé ra kosabà-li nga ndaá tjin xá-li ko nga ndaá bakon-yi 'én kixi-la Cristo. <sup>16</sup>Kì taxki nakjoá-jìn 'én ra mi kì sasén-la Nainá, ra ni mé chjí-la. Jná xita ra ko'sín chja, tà isaá 'nño mincha'taxìn-isa-la Nainá. <sup>17</sup>Jná 'én ra 'cho tsò, 'koaá 'sín jngoya-la koni 'chin ra fi'ndojno-ni ijo-ná. 'Koaá 'sín chja jè Himeneo ko Fileto, <sup>18</sup>nga ijyeé tsincha'taxìn-la ra kjoakixi

nga tsò: jè kjoa ra faháya-la mi'ken ijyee tsato-ní. 'Koaá ma-ni nga sískáya i'ka-la xita kjoa ra makjiín-la. <sup>19</sup>Tanga Nainá ijyee tsikíjna'ño tjà'tsin jngo kjoa ra kixi tjna nándá nga tji'ta 'én ra tsò: “Nainá be-ní yá xita-ni ra 'tse”; ti'koa tsò: “Nga'tsi ra tsò: xita-la Cristo-ná, katincha'taxin-la kjoa ra 'cho tjióon.”

<sup>20</sup>Jngo ni'ya ra je 'kioo, tjin tsajmì ra oro ko plata. Ti'koaá tjin tsajmì ra yá, ko ra ni'nde. Tjin tsajmì ra nichjin nichjòn machjeén, ko tjin ra tà 'kia machjeén 'kia nga nda tíma. <sup>21</sup>Tsa sìtsjeé kjobítsjen-ná nga kincha'taxín-lá kjoa ra 'cho tjióon, 'koaá 'sín sìichjeén-ná Nainá koni jña tsajmì tsje ra tà 'kia machjeén 'kia nga nda tíma, nga titsajjandeé nga sihitjasén nita mé xá-la Nainá ra nda tjin.

<sup>22</sup>Ngaji Timoteo, tisen'taxin-la kjobítsjen ra 'cho tjióon koni 'sín síkítsjen ra ixti. Kíí 'tin-tjìngi-la kjohixi, ko kjoa ra makjiín-ná a'ta 'tse Cristo, ko kjotsjacha, ko kjo'nchán-tákon. Ko'sín 'tin-tjìngi-la kjoa ki, ko xita ra tsje tjin inima-la nga chja'ta-la Nainá. <sup>23</sup>Kì jña kjoa táhijín nisin-la ra nimé chjí-la. Ijyee nda tjíin-li kjoa ki, tà síkjaán-kjoó-ni xita.

<sup>24</sup>Jngo chì'nda-la Nainá mì kì machjeén nga ya skaájin nándá kjaán-kjo xita. Ndaá katasíko ijye nga'tsi xita. Katijnanda nga kokòn-ya 'én-la Nainá. Katachíkjoa-la inima-la ni'sín tà mé kjoa ra kokama'tin. <sup>25</sup>Koó kjonda-la katasíkixiya jña ra xita kondra, tsa kíí nichjin Nainá tsjá-isa-la nichjin nga síkájno-ni jé-la, nga mì ti jé koaàtsji-ni, mé-ni nga kokjiín-la a'ta 'tse kjohixi. <sup>26</sup>'Kia nga tjá'xangi-ni xkon, komaá kitjokajin-ni ya kjoa chòndacha-la xita-níí ya nándá nga tji'tá'ño-la, nga mejèn-la ko'sín sihitjasòn-la koni 'sín mejèn-la ra jè.

### Nichjin ra 'sa nchrabá i'in kama-la xita

**3** <sup>1</sup>Ngaji Timoteo, katasijin-li jè nichjin 'kia nga ijye tímachraña nga kj'íí india-ni Jesucristo, kjín skoya kjoa 'se ra mì kì nda tjin. <sup>2</sup>Jña xita ra 'se, tà jná ijo-la 'ño sìisin-la, jé ton 'ño kotsjake, jná ijo-la isa nda síkítsajna, xita 'nga ikoón koma, 'ño kichjajno-la Nainá ko xita, mì kì kjí'nchréhijon-la xita jhínga-la, mì kì koma-la tsjá ngajo-ni kjonda, mì kì skexkón Nainá. <sup>3</sup>Mì kì kotsjake xákjín, jngó kjá mì kì siije-la ikon, 'én ndisoó koaànè-la xákjín, mì kì sìikinda ijo-la mé kjoa ra 'siin, xita choó koma, kondraá

kiji-la kjoa ra nda tjín, <sup>4</sup>kondraá kiji-la xita ra nda báko, mì tsa ítòn síkítsjen mé kjoa ra 'siin, 'nõ 'nga ikon koma, jé kotsjake kjoa ra sasén-la ijo-la, mì kì kotsjake Nainá. <sup>5</sup>'Koaá 'sín 'siin koni tsa bexkón Nainá, tanga mì kì tsjá'nde nga jè nga'nõ-la Nainá síxájin inìma-la. Kì jñà nisin-la xita kii. <sup>6</sup>Jñà xita kii, bátsji'nde-la nga 'faha'sen ya ni'ya-la íchjín ra mì kì bexkón ijo-la kò ra tse jé tjín-la nga ma kondacha-la. Íchjín kii, yaá fitjìngi-la kjoa ra isa 'cho tjín koni 'sín síjé ijo-la. <sup>7</sup>Kji'tá nichjin inchikotá'yá 'én xitse, tanga nijngo nichjin bijchótjìngi-la kjobítsjen-la nga machiya-la ra kjohixi. <sup>8</sup>Jñà xita kii, 'koaá ti'sín mincha ikon-la ra kjohixi koni 'sín ki'sín xita ra tsi'kìn Janes kò Jambres nga tsincha ikon-la Moisés. Xita kii, jngó kjá 'cho tjín kjobítsjen-la. Bitjongi-ní ya ngixkon Nainá nga mì kì makjiín-la ra kjohixi. <sup>9</sup>Tanga mì kì sìikijne. Kijchó nichjin nga ske ijye xita kjoa chikoán-la. 'Koaá 'sín jcha'tín-la koni jè Janes kò Jambres.

### Kó'sín bí'tin Pablo jè Timoteo nga 'én kixi kòkòn-ya

<sup>10</sup>Tanga ra ji Timoteo, 'koaá 'sín tji'mitjìngi-la koni 'sín tsakon-yá-la, koni 'sín tísíjchá ijo-na, koni 'sín tjín kjobítsjen-na mé kjoa ra tífitjìngi-la. 'Koaá ti'sín makjiín-li koni 'sín makjiín-na a'ta 'tse Cristo. 'Koaá 'sín tse tíjna inìma-li kò tjín-li kjotsjacha koni ra 'an. 'Koaá ti'sín chíkjoa ijye-li nita mé kjoa-nioo koni 'an. <sup>11</sup>Tjìjin-li kó'sín ísikjiáan kjohi'in a'ta 'tse Cristo kò kó'sín mahatjìngi-na xita kondra, koni 'sín kjomà'tiaa ya ján naxindá Antioquía, Iconio kò Listra. ¡Taxki ndaá tsahatjìngi-na xita, tanga jè Na'ín-ná tsachrjejin ijyeé-na nga'tsi kjoa kii! <sup>12</sup>Kixií kjoa, nga'tsi xita ra mejèn-la skexkón Cristo Jesús, 'koaá ti'sín 'se-la kondra nga koaàtjìngi-la. <sup>13</sup>Tanga jñà xita ra 'cho 'sín, ra kondacha, kji'tá nichjin, nga sa 'nõ sa 'nõ 'cho 'siin nga skoóndacha, ti'koa jchóndachaá-te-la ra jñà.

<sup>14</sup>Tanga ra ji, ndaá kixi tikii jñà kjoa ra ichitáyí ra ijye kò'sín nda kjokjiín-li. Ijyeé tjìjin-li yá ra tsakón-ya-li. <sup>15</sup>Skanda ti'kiaá-ní nga ndí ti itsé 'ki, nga 'yaxkin Xajon Tsje ra tjí'ta 'Èn-la Nainá, jè ra ma-la sìichjìne-li kó'sín kítjokajin kjohi'in nga makjiín-li a'ta 'tse Cristo Jesús. <sup>16</sup>Nga'tsi 'én ra tjí'ta Xajon-la Nainá, kjobítsjen 'tse Nainá-ní. 'Koaá 'sín machjeén

nga bakón-ya-ná, nga síkatsíjen-ná kjoa'cho ra 'nié, nga síkixiyanda-ná, nga bakón-ya-ná kó'sín kixi sijché ijo-ná, <sup>17</sup>mé-ni jién ra xitá-lá Nainá 'mì-ná jngo kjá nda kitsajnandeé nga sihitjasén ijyee nga'tsi kjoa ra nda tjín.


### Kó'sín tjínè-lá jè Timoteo nga kichjaya 'Én-lá Nainá

**4** <sup>1</sup>Nó tíbiné-la ya ngixkon Nainá ko Jesucristo ra tjna ítjòn-ná jè ra jeya kj'íí india-ni koni xitaxá ítjòn nga kiindajín-lá xita ra títsajnakon ko ra ijye 'ken. <sup>2</sup>Tínákjoayi 'én nda-lá Cristo. Tijnandi nga ki'ta nichjin nita kó chon. Ko'tin-la xita 'kia nga 'cho 'siin; nda tikixiyi; tì'tin nga 'ñó ka'té-lá ikon. 'Kia nga ko'sín 'siin, 'ñó 'tè-lá inima-li ti'koa koó kjonda-li takón-ya-lá. <sup>3</sup>Kijchó nichjin nga jñà xita mì ti kì kokjiín-lá nga kji'nchré 'én nda ra kixi tjín ra jién bakon-yeé a'ta 'tse Cristo. Tà isaá kjín maestro koaàtsji ra ko'sín kokòn-ya-lá koni 'sín jñà mejèn-lá nga kji'nchré. <sup>4</sup>Kincha'taxìn-lá ra kjohixi, ko jñá kiji'ta-lá ra taxki kuendo 'tse xita jchinga ra mì tsa kixi kjoa. <sup>5</sup>Tanga ji Timoteo, inda 'tè-la takìn nita mé kjoa-nioo, tikjiín kjoa 'tse kjohi'in, kíí xá 'tiin nga tika'bísìn 'én nda-lá Cristo, nda tihitjasin xá ra ji kjongatsji.

<sup>6</sup>'An, ijyee títsja-ná ijo-na koni jngo kjotjò 'tse Nainá. Ijyee ijchó nichjin-lá nga kiyáa. <sup>7</sup>Ijyee nda kiskajàn-tjia xá-lá Cristo; ijyee nda ísihitjásòon xá ra 'an kjongatsja; ndaá tsakátijnako jè 'én ra 'an makjiín-na a'ta 'tse Cristo. <sup>8</sup>'Ndi 'ndi, jè Cristo ra xitaxá kixi tjna, tijnatjò jngo-lá koròna ján ngajmi ra 'an tsjá-na tà ngatjì-lá nga kixi tsakátijnako. 'Kia nga kj'íí india-ni ra jè, mì tsa tà 'an ra tjábé-na, ti'koaá tjábé-te-lá nga'tsi ra tjíjngo ikon nga inchikoñá-lá Na'ín-ná.

### Kó'sín tjín 'én ra bí'tin Pablo jè Timoteo

<sup>9</sup>Tixátíyi nga nditon nchrabájchon-ná. <sup>10</sup>Nga jè Demas, ijyee kitsjin-tákon-na. Jè 'nó matsjake kjoa ra tjín i isà'nde. Yaá kiji ya naxindá Tesalónica. Crescente, yaá kiji nangi Galacia, ko jè Tito yaá kiì nangi Dalmacia. <sup>11</sup>Tà jé Lucas tijnako-na. 'Kia nga kjinchrabì, tjáhajchatí Marcos, nchrabákij. Íí kochjeén-na a'ta 'tse xá ra tí'siaan. <sup>12</sup>Jè Tíquico, yaá ísikáséén Éfeso. <sup>13</sup>'Kia nga kjinchrabì, 'jcha-ná katò-na ra tsakajná ya naxindá Troas ya ni'ya-lá Carpo. 'Jcha-ná jñà xajon-na, tanga jñà ra isa 'ñó 'ñó machjeén nga 'jcha-ná, jñà ra chrjaba kjòon.



*Xajon ra kisinda'tá 'én-la Nainá*

<sup>14</sup>Alejandro, jè ra chjine kicha, 'nó 'cho tjin kjoa ra tísiko-na. Nainá katatsjá-la kjohi'in tà ngatji-la kjoa ra tí'sín. <sup>15</sup>Ngaji Timoteo, tikondii ijo-li a'ta 'tse xita rakii. 'Nó kondra fi-la 'én ra bakon-yeé.

<sup>16</sup>'Kia nga isindajin íjtòn-na ya ngixkon xitaxá, niyá ra tsasiko-na. Nga'tsi xita kitsjin-takón-na. Kì kindá 'sín Nainá kjoa kii. <sup>17</sup>Tanga jè Na'ín-ná tsasikoó-na. Kitsjá-na nga'nó mé-ni nga kjomà kichjàjin-la jñà xita jè 'én nda-la Cristo. 'Koaá 'sín kjomà-ni nga kii'nchré ijye ra mì tsa xita judío. Nainá tsasiko-na nga mì tsa ti'kia ki'tsi-na kjohi'in nga ngi ini'ken-na. 'Koaá 'sín kjomà-ni nga tsato, nga mì ya isikàtjen-jin-na jñà xita ya nándá nga kitse xa. <sup>18</sup>Na'ín-ná kosiko-na a'ta 'tse nga'tsi kjoa ra 'cho tjióon. Kò ikoó-na nándá nga tíbatéxoma ján ngajmi. Nainá, kata'se-la kjoajeya nita mé nó kò nita mé nichjin-nioo. Kò'sín katama.

**Ra fehe'ta-ni, Pablo síhixota xita xákjén**

<sup>19</sup>Tihixot'i jè Prisca kò Aquila kò xita ra tjihijyo ni'ya-la Onesíforo. <sup>20</sup>Erasto, yaá tsikijna ya naxindá Corinto. Jè Trófimo, ján isíkijna naxindá Mileto. Kiya-ní, mì tsa nda tijná. <sup>21</sup>Tixátíyi nga nditon nchrabájchon-ná 'kia nga tikje 'fi nichjin-la cho 'nchán. Tísíhixot'à-li jè Eubulo, Pudente, Lino kò Claudia, kò nga'tsi xita ra 'ndsé chibé.

<sup>22</sup>Jè Jesucristo ra tijná íjtòn-ná katijnako-li. Nga'tsi-no kata'se-no kjonda-la. Kò'sín katama.